

四庫全書

史部

欽定四庫全書

元史卷一百六十六

明翰林學士亞中大夫知制誥兼修國史宋濂等修

列傳第五十三

王綽

王綽高麗王暉之猶子也美容儀慷慨有志略善騎射讀書通大義以質子入朝歲癸丑高麗權臣高令公叛憲宗命雅勒呼大王東征綽奉旨為使講和仍鎮守其

地時高麗人戶新附者命惇總之中統元年授金符總管陞佩虎符兼領軍民三年率兵征濟南李壇至元七年高麗臣林衍叛世祖遣特訥克國王討之惇僉領部民一千三百戶與國王同行是年十一月以疾辭還家二十年九月卒壽六十一子三人阿拉克特穆爾襲職授虎符總管高麗人戶至元八年將兵討叛賊金通精賊敗走耽羅十一年進昭勇大將軍從都元帥呼圖克征日本預有戰功五年加鎮國上將軍安撫使高麗軍

民總管尋陞輔國上將軍東征左副都元帥十八年復
征日本遇風濤遂没于軍庫庫特穆爾入侍武宗潛邸
積勞授太中大夫管民總管威襲兄阿拉克特穆爾職
佩金虎符授安遠大將軍安撫使高麗軍民總管東征
左副都元帥二十四年納延叛力戰屢捷復從伊魯勒
諾延討塔卜台托歡大王于孟克山那江統兵五千餘
衆與巴喇噶齊托歡相拒絕流戰黑龍江箭中右臂忍
傷復戰敵大敗二十五年征哈坦圖魯隸平章庫琳特

穆爾麾下論功居多冬十二月賊軍古都斯多羅干次于烏圖哩寨平章率威討降之明年加授昭武大將軍遼陽等處行中書省事又明年哈坦等入寇高麗國境遣威鎮守仍修城壁嚴卒伍軍威大振賊衆遂潛遁九月哈坦多羅干復寇察楚克威引兵擊却之二十八年入覲世祖于內殿嘉其戰功賜尚方玉帶及銀酒器二十九年改東征左副都元帥府立總管高麗女直漢軍萬戶府乃授威三珠虎符陞鎮國上將軍總管高麗女

直漢軍萬戶府兼瀋陽安撫使高麗軍民總管

隋世昌

隋世昌其先登州棲霞人父寶徙居萊陽金末隸軍伍
主帥奇其貌以為管軍穆昆俄授懷遠大將軍管軍都
總領鎮行村海口太宗下山東寶遂來歸授萊陽令歷
萊州節度判官終高密令世昌其第四子也涉獵書史
善騎射身長八尺鍛渾鐵為鎗重四十餘斤能左右擊
刺歲癸丑選充隊長宋兵來攻海州世昌戰却之壬戌

克東海世昌先登陞馬軍隊官己未攻漣水域世昌樹雲梯攀緣而上身被數鎗衆從之遂克其城陞馬軍千戶中統元年宋將夏貴軍淮南新城世昌夜乘艨艟抵城下宋兵出戰斬首數百級刺殺其守將二人未幾漣水復叛歸宋世昌軍于東馬寨城外宋兵來攻世昌擊走之三年改步軍千戶還鎮行村海口至元元年朝議分揀正軍鄂囉授萊陽縣諸軍鄂囉長官六年伐宋七年以世昌為淄萊萬戶府副都鎮撫守萬山堡建言修

一字城以圍襄樊陞管軍千戶九年敗宋兵于鹿門山
元帥劉整築新門使世昌總其役樊城出兵來爭且拒
且築不終夜而就整授軍二百令世昌立礮簾于樊城
欄馬牆外夜大雪城中矢石如雨軍校多死傷達旦而
礮簾立宋人列艦江上世昌乘風縱火燒其船百餘樊
城出兵鏖戰欄馬牆下世昌流血滿甲勇氣愈壯而樊
城竟破襄陽亦下遷武略將軍引兵由黃浣堡入漢江
破沙洋攻新城世昌坎其城而先登中數矢傷臂挽鏊

皆裂昏眩墜地少蘇復進遂下新城明日丞相巴延視
所坎城高一丈五尺餘論功為上從諸軍渡江抵南岸
宋兵聯舟來拒世昌舍舟師率蒙古哈必齊軍步戰斬
其將一人宋師潰世昌追之復與戰大敗之十二年從
戰于丁家洲以功陞管軍千戶佩金符十三年圍揚州
世昌絕其糧道兼搜湖泊宋兵聞鐵鎗名不敢近揚州
平充四城兵馬使從平章阿珠入見授宣武將軍管軍
總管十四年戍揚州擊野人原司空山等七寨皆下之

進安撫使佩金虎符鎮澈浦十七年拜定遠大將軍管
軍萬戶尋以獲海賊功進階安遠大將軍二十三年改
沂郟上副萬戶世昌前後數百戰體皆金瘡竟以是疾
卒年六十一封定海郡侯謚忠勇子國英嗣

羅壁

羅壁字仲玉鎮江人父大義為宋將壁年十三而孤長
從朱禩孫入蜀累官武翼大夫利州西路馬步軍副總
管禩孫移荆湖壁從之至江陵右丞阿爾哈雅領軍江

陵壁從禩孫降授宣武將軍管軍千戶隸丞相阿珠麾下招收淮軍討歙寇有功領本州安撫事至元五年從元帥張弘範定廣南賜金符陞明威將軍管軍總管鎮金山居四年海盜屏絕徙鎮上海督造海舟六十艘兩月而畢十二年始運江南糧而河運弗便十九年用丞相巴延之言初通海道漕運抵直沽以達于京城立運糧萬戶三而以壁與朱清張瑄為之乃首部漕舟由海洋抵楊村不數十日入京師賜金虎符進懷遠大將軍

管軍萬戶兼管海道運糧二十四年納延叛壁復以漕
舟至遼陽浮海抵錦州小凌河至廣寧十寨諸軍賴以
濟加昭勇大將軍二十五年督漕至直沽倉潞河決水
溢幾及倉壁樹柵率所部畚土築堤捍之陞昭毅大將
軍同知淮西道宣慰司事請兩淮荒閒之田給貧民耕
墾三年而後量收其入從之歲得粟數十萬斛陞鎮國
上將軍海北海南道宣慰使都元帥大德三年除饒州
路總管改廣東道宣慰使都元帥山海獠夷不沾王化

負固反側乃誘致諸洞蠻夷酋長假以官位曉以禍福
由是咸率衆以歸除都水監改正奉大夫通州復多水
患鑿二渠以分水勢又浚阜通河而廣之歲增漕六十
餘萬石奉命括兩淮屯田得疾歸鎮江而卒年六十六
子坤載

劉恩

劉恩字仁甫其先汝水人後徙威州父辛歸國署貝州
長恩幼知讀書勇而有謀以材武隸軍籍累功為百戶

俄遷管軍總管佩銀符大傅府經歷從入蜀數有戰功
宋劉整將兵守瀘州中統三年都元帥納琳遣恩諭整
降以功易賜金符至元三年宋將以戰船五百艘載甲
士三萬人夾江上游先以一萬人據雲頂山欲取漢州
恩率千人渡江與戰殺其將二人士卒三千餘人溺死
者甚衆授成都路管軍副萬戶六年從平章賽音諤德
齊攻嘉定過九頂山與宋軍遇生擒其部將十八人械
送京師賞賚甚厚九年從皇子西平王行省伊蘇岱爾

征建都恩將游兵為先鋒師次其地一日三戰皆捷建
都兵夜來犯圍恩禦之死者千餘人時師久駐食且盡
恩畫策招諭沿江諸蠻得糧三萬石牛羊二萬頭士氣
益振建都因山為城山有七巔恩奪其五斷其汲道建
都窮蹙乃降入朝陞管軍萬戶戊眉州十二年咎萬壽
以嘉定降恩移戍嘉定安西王遣使召恩至六盤山問
曰江南已平四川未下奈何恩曰若以重臣之不徇私
者奉詔督責之則半年可下矣王即遣恩與府僚穆齊

爾乘傳以聞帝以為然命丞相布哈等行樞密院于西
川授恩同僉院事十五年重慶降守將張萬走夔府以
兵固守布哈遣恩招之萬以城降旬月之間得其大小
州邑六十四十六年入朝賞賚有加授四川西道宣慰
使改副都元帥率蒙古漢軍萬人征鄂端進都元帥宣
慰使如故賜寶魯蘇皮衣一錦衣一及弓刀諸物師次
甘州奉詔留屯田得粟二萬餘石十八年命恩進兵鄂
端海都將伊嚕額森率兵萬人迎戰游騎先至恩設伏

以待大敗之海都又遣巴拜率衆二萬來侵恩以衆寡不敵成師而還二十二年僉行樞密院事卒子德祿襲成都管軍萬戶

石高山

石高山德興府人父呼嚕古以侍衛軍從太祖定中原太宗賜以東昌廣平四十餘戶遂徙居廣平之洺水中統三年高山因平章塔齊爾入見世祖因奏曰在昔太祖皇帝所集安扎爾博囉庫爾特依博囉罕巴圖庫庫

布哈五部特默齊軍金亡後散居牧地多有入民籍者
國家土宇未一宜加招集以備驅策帝大悅曰聞卿此
言猶寐而覺即命與諸路同招集之既籍其數仍命高
山佩銀符領之四年授管軍總管鎮息州軍令嚴肅寇
不敢窺居四年邊境晏然賜金符以獎之至元八年從
取光州克棗陽進攻襄樊皆有功十年從阿珠略地淮
上十一年從下江南以功陞顯武將軍十二年冬丞相
巴延命以所部兵取寧國下令無擄掠既至城下諭以

禍福守者開門迎降秋毫無犯復令兵從至焦山與宋將孫虎臣張世傑轉戰百餘里殺獲甚多以功賜金虎符進信武將軍鎮高郵宋平巴延等朝京師帝問有瘦而善戰者朕忘其名巴延以高山對且盛稱其功帝即召見命高山自擇一大郡以佚老而以所部軍俾其子領之高山辭曰臣筋力尚壯猶能為國驅馳豈敢為自安計帝從之進顯武將軍領兵北征屯伊圖山十六年命同和塔拉領三衛軍戍和琳因屯田以給軍儲歲不

乏用納延叛督戰有功賜三珠虎符蒙古侍衛親軍都指揮使守衛東宮成宗憫其老以其子庫庫布哈襲職賜鈔三百錠大德七年卒于家年七十六

鞏彥暉

鞏彥暉易州人與兄彥榮俱以武勇稱初彥榮以百夫長隸千戶何伯祥麾下累有戰功後告老以彥暉代之諸軍伐宋彥暉從破棗陽斬首甚衆萬戶張柔之駐曹武也彥暉與伯祥別將一軍破大洪諸寨宋人出荆鄂

選兵二萬救之彥暉與伯祥逆戰斬首五百級生擒曹路分等一十六人是夜宋兵來攻彥暉率甲士三十人追擊于曹武鎮敵潰走擒其主將以歸戰光州柔軍于東北夜二鼓命彥暉率勁兵二百伏西南五鼓東北聲振天地彥暉植梯先登衆繼之破其外城遂急攻并其子城破之戰滁州彥暉率浮渾脫者十人夜渡滁水入欄馬牆殺守軍三鋪焚其東南角排寨木簾大軍繼之比明拔其城會大軍攻黃州諸將壁壘未定有舟來覘

柔遣彥暉伏甲二百于赤壁之下敵軍夜半果水陸並
至彥暉等曳鎗俟其半過而擊之敵大撓死者無算生
擒十七人師還又破張家寨以守將獻從攻壽州奪其
門生擒三人以出泗州之役諸將自四鼓集城下為塹
水所阻黎明無敢渡者兩軍交射如雨彥暉被重甲徑
渡敵將來禦彥暉刺其胷搏殺之衆畢渡至晡得其外
城尋登其月城彥暉將下顧伯祥失所在乃與王進反
求之敵復追襲彥暉力戰翼伯祥以出由是伯祥與彥

暉如親昆弟然事聞賜彥暉銀符牌俾兼鎮撫事歲已未十一月兵渡江次武昌宋援兵四集彥暉逆戰有舟數十來挑戰彥暉逐之入湖中伏出圍彥暉數匝左右莫能近彥暉矢盡短兵接身被重傷度不可免遂投水中敵援之出載歸江州見宋官不屈問以事不對竟死年五十六長子信襲授銀符易州等處管軍總把中統三年從征李璫至元四年從元帥阿珠南征九年從攻樊城先登奪其土城焚西南角樓殺敵軍十人擒五人

宋將矮張以舟兵來援自高頭堡戰鬪八十餘里抵襄陽城下奪戰艦二獲其裨將二人軍八人十一年從丞相已延攻沙陽堡率勇士五十人火焚其寨敵軍大亂遂破之是年從渡江與宋兵戰俘生口十一奪戰艦二繼又領軍由陸進直抵鄂城下殺宋兵數十人擒江路分一人以歸十二年戰丁家洲殺宋兵七十餘人奪戰艦二江南平以功陞武略將軍管軍千戶鎮太平州十六年以疾辭子思明思溫思恭思明初患目疾以思溫

襲及思溫卒而思明疾愈復以思明襲思明卒以思恭襲懷孟萬戶府管軍下千戶佩金符

蔡珍

蔡珍彰德安陽人父興幼隸軍籍從宗王昆布哈出征權管軍百戶興告老以珍代之珍素驍勇歲戊午從憲宗攻宋合州釣魚山中統元年從世祖征額呼布格三年從征李璫後從鎮襄陽徇安慶攻五河所至有功南方平遂入備宿衛十四年授忠顯校尉管軍總把尋命

權千戶是年冬扈駕駐黑城珍遣兵士儲芻藁築土室
軍府賴其用道遇凍者必扶入密室溫煦之軍糧必為
搏節不使頓絕以致饑困十五年充本衛都鎮撫十七
年陞忠武校尉中衛親軍總把俄改屬後衛賜銀符時
白海初建行營命珍督役卒事民不知擾雖草木無纖
介損帝臨幸問其故近臣以蔡珍號令嚴肅為對帝嘉
之賞以鈔若干二十一年改授膠東海道都漕運司丁
壯萬戶府都鎮撫二十七年進後衛親軍千戶佩金符

元貞元年進階武略俄告老而歸子恕襲

張泰亨

張泰亨堂邑人父山為管軍百戶泰亨襲職從攻宋釣魚山及樊城征努爾阿勒坦有功中統二年授銀符侍衛軍總把三年從圍李璫有功至元四年賜金符陞京東歸德等處新軍千戶從征西川有功授元帥府鎮撫六年改省都鎮撫七年從攻襄陽矢中右臂十年從攻樊城十二年進武略將軍管軍總管尋進明威將軍從

攻潭州矢中鼻拔矢奮戰却敵兵十三年賜虎符進階
武德從征廣西破靜江府十四年還軍潭州金瘡發卒
子繼祖襲移鎮鄂州舟過洞庭溺死子震幼以兄顯祖
代之二十四年從征交趾陷沒震襲職授金符昭信校
尉管軍上千戶延祐二年覃恩加武略將軍尋進階武
德五年陞武節將軍潁州萬戶府副萬戶天歷二年卒
子珽襲

賀祉

賀祉益都人父進嘗平連水有功為元帥左監軍守淄州改千戶守膠州祉初以質子入宿衛至元六年襲父職為千戶仍守膠州七年宋兵攻膠州祉固守戰退之十年領舟師五百艘為先鋒攻五河口城軍還殿後時宋兵以巨索橫截淮水號混江龍祉用大刀斷之却其救兵清河城遂降攻高郵寶應戰淮安城下尸填壕中丞相巴延以其功上聞授武節將軍攻泗州獲戰船五百艘還從右丞伯奇里克默色入朝賜以弓矢錦衣鞍

勅加宣武將軍鎮新城絕淮安寶應糧道降之得戰船
六百艘及器械上于行樞密院遂命領寶應軍民事十
四年特賜金虎符懷遠大將軍二十年建寧路黃華反
以所領軍捕之有功二十四年以征交趾請行湖廣行
省檄令守輜重屯思明州軍還至建康卒

孟德

孟德濟南人國初由鄒平縣令淄州節度使累官至同
知濟南路事太宗即位之八年諸王奎騰命德為元帥

佩金符領濟南軍攻宋徐州光州降其衆而有其地歲
甲辰定宗母六皇后稱制大王阿齊台以德為萬戶攻
濠蘄黃等州積有戰功憲宗即位之三年命德守睢州
五年移守海州宋安撫呂文德以兵擾邊德敗之俘其
太尉劉海丁巳從已延攻襄樊己未與子義從世祖攻
鄂州先登中統三年從征李璫璫平德以老告歸義襲
為萬戶領兵守沂郟四年賜虎符至元元年城郟六年
從山東統軍塔齊如五河宋軍拒南岸義率兵渡河擊

之凡數戰有功九年授懷遠大將軍遷宿州萬戶十一年宋制置夏貴攻正陽義奪戰艦數艘遂敗之十二年掠地至安慶等處攻揚子橋獲功十三年三月改守杭州九月從下福建溫台等處十四年四月授昭勇大將軍瑞州路達魯噶齊十月徙鎮閩州十六年授昭勇大將軍招討使二十二年復為沂鄆萬戶元貞元年以老辭職子智襲職授三珠虎符宣武將軍為萬戶延祐二年進明威將軍以病去職子安世襲

鄭義

鄭義河間人也初事太宗佩金符山東路都元帥兼景州軍民人匠長官從伐金歲壬辰與敵戰于歸德死之弟德溫襲甲午從攻徐州陷陣而死子澤襲從萬戶史天澤出征多立戰功年老弟江代其職世祖北征賜金符授侍衛親軍副都指揮使判武衛軍事兼景州軍民人匠長官中統三年李璫據濟南叛世祖令各州縣長官子弟充千戶于是以江子郇為千戶領景州新僉軍

千餘敗賊衆于王馬橋諸王哈必齊賞銀五十兩璫平
郇以例罷江陞為武衛親軍都指揮使賜虎符尋改屬
左衛至元八年從攻襄陽歿于陣郇襲其職

張榮實

子玉附

張榮實霸州保定縣人父進金季封北平公守信安城
壬辰歲率所部兵民降太宗命為征行萬戶甲午征河
南與金將國用安戰徐州死焉榮實始以質子入宿衛
繼授金符充征行水軍千戶丁酉改雄州保定新城長

官庾子復命統領水軍甲辰從大將蔡罕軍至淮上遇
宋將呂文德與戰俘五十餘人賞銀橈戰馬從攻江陵
略襄陽宋以舟師橫截漢水兵不得度榮實戰却之獲
人百餘戰船數十艘察罕以聞賜錦袍及銀十五斤破
宋軍于太湖賞銀百兩己未從世祖南征駐陽羅渡宋
兵十萬舟二千迎戰橫截江水帝以榮實習于水命居
前列遂取輕舟率麾下水校鏖戰北岸獲宋大船二十
俘二百溺死不可勝計斬宋將呂文信中統元年帝即

位錄其勲勞授金虎符水軍萬戶仍以其子顏代為霸州七處管民萬戶三年李璿叛榮實從史天澤討平之賞金盃及銀二百五十兩馬一疋命鎮膠西至元五年從丞相阿珠攻襄陽敗夏貴擒張順又攻樊城俘其二將賞銀百兩及弓矢鞍勒十一年增領新軍從丞相巴延南征榮實以所部軍先進諸將飛渡鄂漢皆降論功授昭毅大將軍從阿爾哈雅攻岳州降宋將高世傑破沙洋新市降江陵以功加昭武大將軍偕元帥宋托台

征江西隆興擒宋將密佑撫州降十三年授同知江西道宣慰使司事未旬日陞鎮國上將軍福建道宣慰使進兵廣東破降韶州十四年改江東宣慰使行省叅知政事帝以廣東餘黨未附命與右丞達春撫定之十五年入覲帝賜酒慰勞授湖北道宣慰使諸路水軍萬戶是年以疾卒年六十一子顏玉珪

玉襲父職為懷遠大將軍諸路水軍萬戶十六年討吉安叛賊有功入朝賜金織文衣弓矢佩刀加輔國上將

軍都元帥兼水軍萬戶鎮黃州繼奉旨與元帥唐古特
改立蘄黃等路都元帥府仍管領本道鎮守軍馬二十
年廣東盜起過絕占城糧運二十一年玉率兵討平之
從叅知政事頁特密實入朝賜金織文衣鞍勒弓刀會
元帥罷命玉充保定水軍上萬戶二十二年都陽湖賊
起詔徙水軍萬戶府于南康二十四年從叅知政事烏
瑪喇征交趾累戰有功二十五年師還安南以兵迎戰
大戰連日水涸舟不能行玉死焉子輔襲萬戶輔卒子

道重襲

舒穆魯格根

舒穆魯格根契丹人其先曰高努辛未太祖至威寧高努與劉伯林瓜爾佳常格等以城降會置三萬戶三十六千戶以總天下兵以高努為千戶遙授青州防禦使佩金符己丑從太宗伐金為征行千戶卒于軍子常山襲為千戶癸丑陞總管領興元諸軍鄂囉屯田并寶雞驛軍權都總管萬戶歲餘卒子奇爾襲領本萬戶諸翼

軍馬從都元帥納琳攻重慶瀘敍諸城數有功時呼圖克叛于臨洮奇爾等以蒙古漢軍從征討之至元二年從都元帥阿敦移鎮潼川四年九月從攻蓬溪砦死焉子格根襲格根少從征伐以壯勇稱八年從僉省嚴忠範以兵圍重慶攻朝陽砦先登九年宋將咎萬壽率衆襲成都格根以蒙古軍二千擊敗之十六年朝廷錄其前後功賜金虎符授宣武將軍管軍總管戍遂寧十七年進明威將軍管軍副萬戶亦奚不薛蠻叛從招討使

雅爾哈討平之行省伊蘇岱爾討都掌烏蒙蟻子諸蠻
戰于鴨樓關格根最有功二十一年以蒙古軍八百從
征散猫蠻戰于菜園坪滲水溪皆敗之壁守石砦月餘
散猫降大盤諸蠻亦降二十四年遷懷遠大將軍夔路
萬戶移戍重慶二十六年卒子安圖襲

楚鼎

楚鼎安豐蒙城人父珣仕金為鎮國上將軍壽春府防
禦使金亡歸宋命守宿州歲己亥以州降阿穆爾命珣

守之宋兵來攻宿州城破珣死之宋人囚鼎于鎮江府
凡十有四年會赦免至元十二年師渡江鼎從知太平
州孟之紹降行省遣鼎諭寧國府守將孫世賢下之承
制授鼎管軍總管制下加懷遠大將軍領兵鎮寧國平
建平南湖廣德諸盜鼎與權萬戶博囉台護送徽州招
撫使李銓男漢英歸徽州諭銓下其城十三年漢英與
李世達叛旌德太平兩縣附之鼎與烏爾古納進兵用
徽人鄭安之策按兵而入兵不血刃而亂定十五年鼎

始受符印十八年東征日本鼎率千餘人從左丞范文虎渡海大風忽至舟壞鼎挾破舟板漂流三晝夜至一山會文虎船因得達高麗之金州合浦海屯駐散兵亦漂泛來集遂領之以歸

樊楫

樊楫冠州人初為軍吏從叅政阿爾哈雅下鄂江陵有功以行省命為都事宋平從入朝改員外郎從定廣西陞郎中從攻厓山進叅議行中書省事同知湖南宣慰

司事至元二十一年擢僉荆湖占城行中書省事從阿爾哈雅征交趾無功二十四年復征交趾進行中書省叅知政事時三道進兵皇子鎮南王與右丞程鵬飛分二道一入永平一入女兒關楫與叅政烏瑪喇將舟師入海與賊舟遇安邦口楫擊之斬首四千餘級及生擒百餘人獲船百餘艘兵仗無算遂至萬劫山合鎮南王兵十二月進攻交趾陳日烜棄城走敢喃堡二十五年正月王攻敢喃堡破之日烜走入海中交人皆匿其粟

而逃張文虎餽餉不至二月天暑食且盡于是王命班
師楫與烏瑪喇將舟師還為賊邀遮白藤江潮下楫舟
膠賊舟大集矢下如雨力戰自卯至酉楫被創投水中
賊鈎執毒殺之至順元年贈推忠宣力効節功臣資德
大夫江浙行省右丞上黨郡公諡忠定

張均

張均濟南人也父山從軍伐宋以功為百戶俄陞總把
戰死均襲百戶從親王塔齊爾攻鄂州面中流矢中統

三年從征李璫有功以總帥命陞千戶領兵守淄州至
元六年從左丞董文炳攻宋五河口轉戰濠州北遇其
伏兵均率衆力戰敗之十年攻漣州奪孫村堡十二年
賜金符授忠翊校尉沂郟翼千戶從攻蕪湖奪宋戰船
俘四十餘人又從丞相安塔哈戰有功加武略將軍十
四年賜虎符加宣武將軍二十二年陞松江萬戶二十
四年從鎮南王征交趾二十六年從北征擢明威將軍
前衛親軍副都指揮使三十年世祖親征納延以扈從

受賞成宗即位命屯田和琳規畫備悉有法諸王永和爾北征給餉賴之未嘗乏絕帝嘉其能賜予有加大德元年改和琳等處副元帥歷宣慰司同知陞都元帥加鎮國上將軍延祐二年卒子世忠襲前衛親軍副都指揮使

信苴日

信苴日契人也姓段氏其先世為大理國王後累為權臣高氏所廢歲癸丑當憲宗朝世祖奉命南征誅其臣

高祥以段興智主國事乙卯興智與其季父信苴福入
覲詔賜金符使歸國丙辰獻地圖請悉平諸部并條奏
治民立賦之法憲宗大喜賜興智名瑪哈嚕磋命悉主
諸蠻白爨等部以信苴福領其軍興智遂委國任其弟
信苴日自與信苴福率剌爨軍二萬為前鋒導大將烏
蘭哈達討平諸郡之未附者攻降交趾入朝興智在道
上卒中統二年信苴日入覲世祖復賜虎符詔領大理
善闡威楚統失會川建昌騰越等城自各萬戶以下皆

受其節制至元元年舍利畏結威楚統失善闡及三十
七部諸爨各殺守將以叛善闡屯守官不能禦遣使告
急信苴日率衆進討大敗之于威楚寶滿伊復遣博囉
攻賊於統失城又大破之遂定統失其秋舍利畏又以
衆十萬謀攻大理詔都元帥額森與信苴日討之師至
安寧遇舍利畏擊破走之遂復善闡降威楚定新興進
攻石城肥膩皆下之爨部平三年信苴日入覲錄功賜
金銀衣服鞍勒兵器十一年賽音諤德齊為雲南行省

平章政事更定諸路名號以信苴日為大理總管未幾
舍利畏復叛信苴日遣實默等詭為商旅執贄往見刺
殺之及其黨一人梟首于市行省以聞復賜金一錠及
金織文衣於是置郡縣署守令行賦役施政化與中州
等十三年緬國擁象騎數萬掠金齒南甸欲襲大理行
省遣信苴日與萬戶呼圖克領兵千人禦之信苴日以
功授大理蒙化等處宣撫使十八年信苴日與其子阿
慶復入覲帝嘉其忠勤進大理威楚金齒等處宣慰使

都元帥留阿慶宿衛東宮及陞辭復拜為雲南諸路行
中書省叅知政事十九年詔同右丞拜達勒迎雲南征
緬之師行至金齒以疾卒信苴日治大理凡二十三年
子阿慶襲爵累授鎮國上將軍大理金齒等處宣慰使
都元帥佩金虎符

王實喇

王實喇保定人初事世祖以其有勇略遂賜名實喇已
圖從攻釣魚山及額呼布格累功賜金符授武衛親軍

千戶中統三年從征李璫于濟南屢捷四年春元帥阿
珠駐兵河南遣實喇將蒙古漢軍復立宿州至元六年
賜虎符陞海州萬戶引兵攻鹽林山寨多所俘獲十年
授東川行樞密院同僉十五年征夔府有功十六年徙
鎮萬州卒于軍子二曰宏曰寧宏先佩金符為左衛千
戶及樞密院掇寧襲武職寧讓其兄宏于是授宏中衛
都指揮使佩父虎符而以寧代宏為千戶佩金符寧從
阿爾台哈達遜北征追擊托克托穆爾之軍于阿納爾

圖師還又徙伯奇里克默色等擊賊威喇斬首百餘級復徙和爾果斯北征有功陞右衛親軍總管後改前衛都指揮使司僉事子處恭襲宏職仕至侍御史

趙宏偉

趙宏偉字子英甘陵人徙潁川至元十三年國兵攻宋宏偉以書謁元帥宋都木達于軍中奇之俾以兵略地臨江至吉州宋主將管忠節路分鄒超悉衆出戰宏偉敗之追北二十餘里薄具城示以禍福知州周天驥以

城降宋都木達嘉宏偉有功賞銀三十兩署為吉州叅
佐官民有為亂者宏偉設伏橋下以火攻之賊戰退走
伏發衆蹂踐幾盡乘勝擣其巢穴餘黨悉出拒戰宏偉
旋兵襲其背斬其渠魁一州遂安宋廂禁軍總管王昌
勇敢軍總管張雲誘新附五營軍為亂事覺昌就擒宏
偉夜襲雲斬首以獻俘具黨五百人宋都木達欲盡誅
之宏偉曰此屬誑誤非得已也今悉就誅何以安反側
衆得免死以功授泰和縣戶宋相文天祥署其將羅開禮

葉良臣集衆謀復古贛臨江宏偉斬良臣俘開禮釋其
餘衆十五年以功賜金符遷瓜洲河渡提舉十七年改
衡州路總管府治中羣盜出沒其境宏偉計其地興屯
田民既足食盜亦為農郡遂寧謐大德五年用中丞董
士恒薦起僉浙西道肅政廉訪司事鎮江旱蠲民租九
萬餘石吏畏飛語復徵于民民無所出行臺令宏偉核
實卒蠲之大風海溢潤常江陰等州廬舍多蕩沒民乏
食宏偉將發廩以賑有司以未得報為辭宏偉曰民旦

暮饑擅發有罪我先坐遂發之全活者十餘萬遷江南
行臺都事十一年江南大饑宏偉請以贓罰錢賑之民
賴以生至大二年召為內臺都事仁宗在東宮時聞其
名遇之甚厚常以字呼之及出為浙東廉訪副使陞辭
之日仁宗出幣帛俾擇所欲者即賜之宏偉至浙東聞
郡人許謙得朱熹道學之傳延致為師于是人知向慕
未幾擢江南行臺治書侍御史皇慶二年致仕延祐二
年復起為福建道肅政廉訪使未幾以疾辭泰定三年

卒年四十四贈嘉議大夫禮部尚書上輕車都尉追封
天水郡侯謚貞獻子思恭追封天水郡侯思敬以處士
徵為教授孫璉別有傳

元史卷一百六十六

元史卷一百六十六考證

隋世昌傳十二年從戰於丁家洲 按原刻誤作十三

年事今據本紀改

劉恩傳其先洛水人後徙威州 按原刻作洛之洛水

人今據元史類編改與前後諸傳體例畫一

張榮實傳已未從世祖南征 按已未原刻誤作乙未

考本紀載憲宗九年已未世祖奉命率兵渡江與衆

師戰進圍鄂州傳云榮實從世祖南征當即指其時

且以世次支干推之乙未係太宗七年今據改

張均傳十年攻漣州 按攻漣州即承前文征李瓊而

言蓋指漣水軍也原刻誤作連州連州乃廣東州名

與征李瓊無涉但漣水軍於何時陞州考宋元地理

志俱未之載惟本紀及李瓊傳有漣海二州云云今

據改

趙宏偉傳孫連別有傳 按趙連傳連係宏偉之孫原

刻稱趙連與前後諸傳體例不符今改

欽定四庫全書

元史卷一百六十七

明翰林學士亞中大夫知制誥兼修國史宋濂等修

列傳第五十四

張立道

張立道字顯卿其先陳留人後徙大名父善登金進士
第歲壬辰國兵下河南善以策干太弟圖類命為筆且
齊立道年十七以父任備宿衛世祖即位立道從北征

未嘗去左右至元四年命立道使西夏給所部軍儲以幹敏稱皇子和克齊封雲南王往鎮其地詔以立道為王府文學立道勸王務農以厚民即署立道大理等處勸農官兼領屯田事佩銀符尋與侍郎甯端甫使安南定歲貢之禮雲南三十七部都元帥保赫鼎專制歲久有竊據之志忌和克齊來為王設宴置毒酒中且賂王相府官無泄其事立道聞之趨入見守門者拒之立道怒與爭王聞其聲使人召立道乃得入為王言之王引

其手使探口中肉已腐矣是夕王薨保赫鼎遂據王座使人諷王妃索王印立道潛結義士得十三人約共討賊刺臂血和金屑飲之推一人走京師告變事頗露保赫鼎乃囚立道將殺之人匠提舉張忠者燕人也於立道為族兄結壯士夜劫諸獄出之共亡至土番界遇帝所遣御史大夫博爾歡王傳之圖與告變人俱來二人者遂與立道俱還按保赫鼎及王府官嘗受賂者皆伏誅有旨召立道等入朝問王薨時狀帝聞立道言泣數

行下獻款久之曰汝等為我家事甚勞苦今欲事朕乎
事太子乎事安西王乎惟汝意所向立道等奏願留事
陛下於是賜立道金五十兩以旌其忠張忠等亦皆授
官有差八年復使安南宣建國號詔立道並黑水跨雲
南以至其國歲貢之禮遂定十年三月領大司農事中
書以立道熟於雲南奏授大理等處巡行勸農使佩金
符其地有昆明池介碧雞金馬之間環五百餘里夏潦
暴至必冒城郭立道求泉源所自出役丁夫二千人治

之洩其水得壤地萬餘頃皆為良田饁餼之人雖知蠶桑而未得其法立道始教之飼養收利十倍於舊雲南之人由是益富庶羅羅諸山蠻慕之相率來降收其地悉為郡縣十五年除中慶路總管佩虎符先是雲南未知尊孔子祀王逸少為先師立道首建孔子廟置學舍勸士人子弟以學擇蜀士之賢者迎以為弟子師歲時率諸生行釋菜禮人習禮讓風俗稍變矣行省平章賽音諤德齊表言於朝有旨進官以褒之十七年力請於

帝以雲南王子額森特穆爾襲王爵帝從之遂命立道
為臨安廣西道宣撫使兼管軍招討使仍佩虎符陞辭
賜以弓矢衣服鞍馬始赴任會禾泥路大首領必思反
扇動諸蠻夷亟發兵討之拔其城邑鼓行而前徇金齒
甸七十城越麻甸抵可蒲皆下之有遺以馴象金鳳異
物者悉獻諸朝二十二年又籍兩江儂士貴岑從毅李
維屏所部戶二十五萬有奇以其籍歸有司遷臨安廣
西道軍民宣撫使復創廟學於建水路書清白之訓於

公廨以警貪墨風化大行入朝值權臣用事遂退居散地條陳十二策皆切當世之務帝嘉納焉二十七年北京地陷人民震驚命立道為本路總管未行安南世子陳日燭遣其臣嚴仲羅陳子良等詣京師告襲爵先是其國主陳日烜累召不至僅遣其族父遺愛入貢朝廷因封為安南王遺愛還日烜陰害之遣使問罪日烜拒使者不受命遂遣將討之失利而還帝怒欲再發兵丞相諤勒哲平章博果密言蠻夷小邦不足以勞中國張

立道嘗再使安南有功今復使往宜無不奉命帝召至
香殿諭之曰小國不恭今遣汝往諭朕意宜盡乃心立道
對曰君父之命雖蹈水火不敢辭臣愚恐不足專任乞
重臣一人與俱臣為之副帝曰卿朕腹心臣使一人居
卿上必敗卿謀遂授禮部尚書佩三珠虎符賜衣段金
鞍弓矢以行至安南界謂郊勞者曰語爾世子當出郭
迎詔日燭乃率其屬焚香伏謁道左既抵府日燭拜跪
聽詔如禮立道傳上命數其罪為書曉之日燭曰比三

世辱公使公大國之卿小國之師也何以教我立道曰
昔鎮南王奉詞致討汝非能勝之也由其不用嚮導率
衆深入不見一人遲疑而還曾未出險風雨驟至弓矢
盡壞衆不戰而自潰天子亦既知之汝所恃者山海之
險瘴癘之惡耳且雲南與嶺南之人習俗同而技力等
今發而用之繼以北方之勁卒汝復能抗哉汝戰不利
不過遁入海中島夷乘釁必來寇抄汝汝食少不能支
必為彼屈汝為其臣孰若為天子臣乎今海上諸夷歲

貢於汝者亦畏我大國之爾與也聖天子有德於汝甚厚前年之師殊非上意邊將讒汝爾汝曾不悟不能遣一介之使謝罪請命輒稱兵抗拒逐我使人以怒我大國之師今禍且至矣惟世子計之日燔拜且泣涕而言曰公之言良是也為我計者皆不知出此前日之戰救死而已寧不知懼天子使公來必能活我北面再拜誓死不敢忘天子之德遂迎立道入出奇寶為賄立道一無所受但要日燔入朝日燔曰貪生畏死人之常情誠

有詔貸以不死臣將何辭乃先遣其臣阮代之何惟巖等隨立道上表謝罪修歲貢之禮如初且言所以願朝之意廷臣有害其功者以為必先朝而後赦日燭懼卒不敢至議者惜之二十八年遣立道奉使按行兩浙尋以為四川南道宣慰使遷陝西漢中道肅政廉訪使三十年皇曾孫蘇克緞封梁王出鎮雲南大德二年廷議求舊臣可為梁王輔行者立道以陝西行臺侍御史拜雲南行省參政視事期月卒於官立道凡二使安南官

雲南最久頗得士人之心為之立祠廟善闡城西立道
所著詩文有效古集平蜀總論安南錄雲南風土記六
詔通說若干卷子元雲南行省左右司郎中

張庭珍

弟庭瑞

張庭珍字國寶臨潢全州人父楫金商州南倉使歲壬
辰籍其民數千來降太宗命監榷北京等路賦課俄改
北京都轉運使因家北京歲辛亥憲宗即位以庭珍為
筆且齊高麗不請命擅徙居海中江華島遣庭珍往問

之其王言臣事本朝未嘗不謹而大軍歲入侵掠避而走險不得已也且賂庭珍金銀數千兩庭珍却之而歸以狀聞帝為禁戍兵無擅入其地高麗以安帝伐宋至閬州授安撫使世祖即位自將北伐以庭珍熟知西京入漠南路遣立沙井諸驛兼給糧運俄授同僉土番經畧使至元六年安南入貢不時以庭珍為朝列大夫安南國達嚕噶齊佩金符由土番大理諸蠻至於安南世子光昞立受詔庭珍責之曰皇帝不欲以汝土地為郡

縣而聽汝稱藩遣使喻旨德至厚也王猶與宋為唇齒
妄自尊大今百萬之師圍襄陽拔在旦夕席卷渡江則
宋亡矣王將何恃且雲南之兵不兩月可至汝境覆汝
宗祀有不難者其審謀之光晒惶恐下拜受詔既而語
庭珍曰聖天子憐我而使者來多無禮汝官朝列我王
也相與抗禮古有之乎庭珍曰有之王人雖微序於諸
侯之上光晒曰汝過益州見雲南王拜否庭珍曰雲南
王天子之子汝蠻夷小邦特假以王號豈得比雲南王

況天子命我為安南之長位居汝上耶光晒曰既稱大國何索吾犀象庭珍曰貢獻方物藩臣職也光晒無以對益慚憤使衛兵露刃環立以恐庭珍庭珍解所佩弓刀坦臥室中曰聽汝何為光晒及羣下皆服明年遣使隨庭珍入貢庭珍見帝以所對光晒之言聞帝大悅命付翰林承旨王磐紀之授襄陽行省郎中與阿爾哈雅從數騎抵襄陽南門呼宋將呂文煥語曰我師所攻無不取者汝孤城路絕外無一兵之援而欲以死守求空

名如闔郡之人何汝宜早圖之文煥帳前將田世英曹彪執其總管武榮來降文煥益孤明日遣黑楊都統來議納款將遣之還報庭珍曰彼來或以計覘我未能必其果降此人呂氏腹心不如留之以伐其謀元帥阿珠然之乃留不遣又明日文煥舉城降以功遷中順大夫遙授知歸德府行樞密院經歷諸軍南渡復為行省郎中俄授金虎符襄陽總管兼府尹改郢復二州達魯噶齊宋平遷平江路達魯噶齊改同知浙東宣慰使司事

未行拜大司農卿連居親憂起復南京路總管兼開封府尹開封有控鶴軍士十餘人賃大宅聚居縱橫街陌庭珍始至察其必為盜急捕之得寶玩器服子女滿室窮索其黨俱殺之民以為神河決灌太康漂溺千里庭珍括商人漁子船及縛木為筏載糗糧四出救之全活甚衆水入善利門庭珍親督夫運薪土捍之不能止乃頽城為堰水既退即發民增外防百三十里人免水憂俄卒於官庭珍性清慎丞相巴延嘗語人曰諸將渡江

無不荒貪唯我與國寶始終自守聞者以為知言弟庭瑞

庭瑞字天表幼以功業自許兵法地志星厯卜筮無不推究以宿衛從憲宗伐蜀為先鋒中統二年授元帥府參議留戍青居諸軍攻開州達州庭瑞將兵築城虎嘯山扼二州路宋將夏貴以師數萬圍之城當礮皆穿築柵守之柵壞乃依大樹張牛馬皮以拒礮貴以城中人飲於澗外絕其水庭瑞取人畜溲沸煮之瀉土中以洩

臭人日飲數合唇皆瘡裂堅守踰月援兵不敢進庭瑞
度宋兵稍懈三分其兵夜劫貴營宋兵驚潰殺都統樂
俊雍貴胡世雄等五人斬千餘級庭瑞亦被傷數處以
功授奉議大夫知高唐州改濮州尹遷陝西四川道按
察副使政過於猛上官弗便陷以罪徙四川屯田經畧
副使東西川行樞密院發兵圍重慶朝廷知庭瑞練習
軍事換成都總管佩虎符舟楫兵仗糧儲皆倚以辦蜀
平陞諸蠻夷部宣慰使甚得蠻夷心碉門羌與婦人老

幼入市爭價殺人碯門魚通司繫其人羌酋怒斷繩橋謀入劫之魚通司來告急左丞汪惟正問計庭瑞曰羌俗暴悍以鬪殺為勇今如蜂毒一人而即以門牆之寇待之不可宜遣使往諭禍福彼悟當自回矣惟正曰使者無過於君遂從數騎抵羌界羌陳兵以待庭瑞進前語之曰殺人償死羌與中國之法同有司繫諸人欲以為見證耳而汝即肆無禮如行省聞於朝召近郡兵空汝巢穴矣其酋長棄槍弩羅拜曰我近者生裂羊胛卜

之視肉之文理何如則吉其兆曰有白馬將軍來可不
勞兵而罷今公馬果白敢不從命乃論殺人者餘盡縱
遣之遂與約自今交市者以碭門為界無相出入官買
蜀茶增價鬻於羌人以為患庭瑞更變引法使每引納
二緡而付文券與民聽其自市於羌羌蜀便之先時運
糧由楊山沂江往往覆陷庭瑞始立屯田人得免患都
掌蠻叛蠻善飛鎗聯松枝為牌自蔽行省命庭瑞討之
庭瑞所射矢出其牌半斲蠻驚曰何物弓矢如此之力

即請服惟斬其首蘭德酉等十餘人而招復其餘民授敘州等處蠻夷部宣撫使改潭州路總管時湖廣省臣方利民為功庭瑞知不可拒乃辭歸闕中三年思成都遂從漢中分家奴往居焉以疾卒庭瑞初屯青居其土多橘時中州艱得蜀藥其價倍常庭瑞課閔卒日入橘皮若干升儲之人莫曉也賈人有喪其資不能歸者人給橘皮一石得錢以濟莫不感之家有愛妾一日見老人與之語乃其父也妾以告庭瑞召視之其貌甚似問

欲得汝女歸耶其人以為幸侍左右非敢求與歸庭瑞
曰汝女居吾家不過羣婢歸嫁則良人矣盡取奩裝書
券還之時人以為難

張惠

張惠字廷傑成都新繁人宋尚書右僕射商英之裔孫
也其先徙居清河後徙蜀歲丙申惠年十四兵入蜀被
俘至杭愛居數年通諸國語丞相茂蘇蘇愛而薦之入
侍世祖藩邸以謹敏稱賜名烏爾古朶爾圖世祖即位

授燕京宣慰副使為政寬簡奏免分數錢罷硝磺局俄
遷侍中至元元年冬遷叅知政事行省山東以銀贖俘
囚三百餘家為民其不能歸者使為僧建寺居之李璫
之亂山東民被軍士擄掠者甚衆惠至大括軍中悉縱
之又奏選良吏去冗官以蘇民瘼遷制國用司副使會
改制國用司為尚書省拜叅知政事遷中書左丞進右
丞已延帥師伐宋十二年夏詔惠主其饋餉凡江淮錢
穀皆領之十二年春宋降巴延命惠與叅知政事阿魯

罕等入城按閱府庫版籍收其太廟及景靈宮禮樂器
物冊寶郊天儀仗籍江南民為工匠凡三十萬戶惠選
有藝業者僅十餘萬戶餘悉奏還為民巴延以宋主北
還俾惠居守惠不待命輒啓府庫封鑰巴延以聞詔左
丞相阿珠平章政事安塔哈詰之徵還京師二十年拜
榮祿大夫平章政事行省揚州二十二年入朝復命以
平章政事行省杭州至無錫卒年六十二惠所至有能
聲及老頗以沈浮取譏子遵誨

劉好禮

劉好禮字敬之汴梁祥符人父仲澤金大理評事選授同知許州徙家保定之完州好禮幼有志知讀書通國言憲宗時廉訪府辟為叅議歲乙卯改永興府達魯噶齊至元元年以侍儀廉希逸薦召見言舉人材數事稱旨五年應詔建言凡有司奏請宜先啓皇太子俾得聞習庶政以為社稷生民之福陝西重地宜封皇子諸王以鎮之創築都城宜給直以市民地選格不宜以中統

三年為限後是者不錄帝是其言勅中書施行七年遷
伊蘭州等五部斷事官以比古之都護治伊蘭其地距
京師九千餘里民俗不知陶冶水無舟航好禮請工匠
於朝以教其民迄今稱便或言榷鹽酒可以佐經費好
禮曰朝廷設官要荒務以綏遠寧欲奪其利耶言者慚
服十年北方諸王叛執好禮軍中幾死其大將以好禮
善應對釋之十六年春叛王召好禮至欠欠州曰皇帝
疑我至有今日好禮曰不疑果疑王召王至京師肯還

之耶十七年春好禮率衆走別部守阨以待兵至遇叛
王軍迫好禮西踰雪峩嶺好禮自度踰是則無望其還
遂以衣服賂叛王千戶始獲東出鐵壁山口間道南走
數日從者繼至且千人中道糧絕捕獵以為食七月至
珠嚕海始與戍兵接得乘傳至昌州入見帝賜食與鈔
十八年授嘉議大夫澧州路總管十九年入為刑部尚
書俄改禮部又改吏部好禮建言中書象力最巨上往
還兩都乘輿象駕萬有一變從者雖多力何能及未幾

象驚幾傷從者二十一年出為北京路總管再入為戶部尚書二十五年六月卒年六十二子晟為河西隴右道肅政廉訪使

王國昌

子通

王國昌膠州高密人初為膠州千戶中統元年入覲世祖察其能遷左武衛親軍千戶佩金符召問軍旅之事國昌奏對甚悉帝嘉之賜白金錦袍至元五年人有上書言高麗境內黑山海道至宋境為近帝命國昌往視

之泛海千餘里風濤洶湧從者恐勸還國昌神色自若
徐曰奉天子威命未畢事而遽返可乎遂至黑山乃還
帝延見慰勞而東夷皆內屬惟日本不受正朔帝知隋
時曾與中國通遣使諭以威德令國昌率兵護送道經
高麗時高麗有叛臣據珍島城帝因命國昌與經畧使
茂圖史樞等攻拔之八年復遣使入日本乃命國昌屯
於高麗之義安郡以為援冬十月卒於軍子通嗣

通初襲爵為左衛親軍千戶十二年從諸軍伐宋渡江

鎮鄂州時潭州不下兵薄其城通以所將千人破其柵
宋兵遁去通縱兵追擊殺獲甚衆以功進武節將軍從
攻靜江下之十四年改侍衛親軍千戶明年通上書言
今南方已定而北陲未安請屯田於和琳率所部自効
帝慰勞遣之從破敵兵於金山俘獲生口及馬羊牛駝
不可勝計進顯武將軍賜金虎符陞僉左衛親軍都指
揮使從討叛王納延遷副都指揮使明年屯田瓜沙諸
州進階明威將軍武宗即位命總京城衛兵樞密院復

奏通攝左丞領諸衛屯田兵尋遷屯儲衛親軍都指揮使鎮海口以疾卒子揚珠布哈襲武德將軍左衛親軍副都指揮使

姜彧

姜彧字文卿萊州萊陽人也父椿避亂往依濟南張榮因家焉彧幼穎悟好學榮守濟南辟為掾陞左右司知事尋遷郎中進叅議官中統三年彧與榮孫宏入朝因言益都李壇反狀已露宜先其未發制之未報明年春

瓊果反時諸郡不為兵備瓊即襲據濟南或棄家從榮
招集散亡迎諸王哈必齊進兵討之秋七月捕得生口
言城中糧盡勢蹙或乃昏夜請見王曰聞王陛辭時面
受詔曰發兵誅瓊耳毋及無辜今旦夕城且破王宜早
諭諸將分守城門勿令縱兵不然城中無噍類矣王曰
汝言城破解陰陽耶或曰以人事知之若待城破言於
王晚矣王悟明日賊衆開門出降王下令諸軍敢入城
者論以軍法瓊就擒城中按堵如故或以功授大都督

府叅議改知濱州時省營軍士多占民田為牧地縱牛馬壞民禾稼桑棗或言於中書遣官分畫疆畔捕其強猾不法者置之法乃課民種桑歲餘新桑徧野人名為太守桑及遷東平府判官民遮道請留馬為之不行至元五年拜治書侍御史出為河北河南道提刑按察使賜金虎符改信州路總管後累遷陝西漢中河東山西道提刑按察使拜行臺御史中丞後以老病歸濟南尋擢燕南河北道提刑按察使三十年二月以疾卒年七

十六子迪吉

張礎

張礎字可用其先渤海人金末曾祖琛徙燕之通州祖伯達從呼圖克諾延畧地燕薊金守臣富察齊錦以城降呼圖克承制以伯達為通州節度判官遂知通州父範為真定勸農官因家焉礎業儒丙辰歲平章廉希憲薦於世祖潛邸時真定為諸王額呼布格分地額呼布格以礎不附已銜之遣使言於世祖曰張礎我分地中

人當以歸我世祖命使者復曰兄弟至親寧有彼此之間且我方有事於宋如礎者實所倚任待天下平定當遣還也已未從世祖伐宋凡徵發軍旅文檄悉出其手中統元年立中書省以礎權左右司事尋出為彰德路拘權官復入為三部員外郎賜金符為平陽路同知轉運使改知獻州同知東平府事又改知威州有婦人乘驢過市者投下官昂吉之奴引鳴鏑射婦人墜地奴匿昂吉家礎將以其事聞昂吉懼乃出其奴論如法至元

十四年立諸道提刑按察司以礎為江南浙西道提刑按察副使佩金符宣慰使實哩貪暴掠良民為奴礎劾黜之遂安縣民聚眾負險以為亂命礎與同知浙西道宣慰使劉宣領兵捕之宣即欲進兵礎曰江南新附守吏或失撫字宜遣人招諭以全眾命宣不可礎曰諭之不來加誅未晚遂遣人諭之逆黨果自縛請罪礎釋之宣乃歎服遷鎮南廣西道提刑按察使廣西宣慰使伊埒圖強奪民財礎按其罪遷鎮北湖南道提刑按察副

使授賓州路總管不赴拜國子祭酒尋出為安豐路總管三十一年卒於官年六十三贈昭文館大學士正奉大夫封清河郡公諡文敏子淑衛輝路推官

呂塋

呂塋字伯充河內人七世祖公緒與宋丞相公著為從昆弟祖庭金末避亂去鄉里父佑歸附初隸兵籍轉徙北郡復至關中家焉廉希憲宣撫京兆聘許衡教授生徒塋從衡學衡為國子祭酒舉塋為伴讀輔成教養塋

之功為多至元十三年擢陝西道按察司知事未行會
宋降者言襄漢新附民情未安有呂子開者向為襄陽
制置司叅謀官今退居鄂其人悉知宋事宜徵用之朝
廷議遣使而難其人或言子開舊名偉金亂入宋更名
文蔚字子開於盛為從叔父宜遣盛行時江淮兵猶未
戢盛聞之慨然請行子開既入覲陳安撫襄漢便宜詔
以子開為翰林直學士辭不就十四年授盛四川行樞
密院都事時宋制置使張珏守重慶安撫使王立守合

州詔樞府分兵取之李德輝行西院事於成都獲立傾
卒張邵等數人將殺之盛曰彼不即降者以昔嘗抗命
城降懼誅耳今宜釋邵等俾歸諭立未幾立果遣邵等
賫蠟書至成都德輝請與東院同受降後期不至德輝
承制授立仍為安撫使知合州開倉賑民禁戢剽掠而
瀘敘崇慶思播夔萬等郡聞之相繼送款巴黔民感盛
與德輝之惠並祠事之東院恥其無功誣德輝越境邀
功械立於長安獄將誅之盛適以事至京師言於許衡

衡白留守賀仁傑遂奏釋立賜金虎符仍舊官壘亦以
平定四川功詔賜金織衣弓刀鞍勒白金陞奉訓大夫
四川行省左右司郎中十九年調同知順慶路總管府
事以疾辭二十年徵為國子司業以未終喪辭三十年
改華州知州勸農興學具有成效及代民爭留之大德
中河東闕隴地震月餘不止壘與集賢學士蕭𦉰各設
問答數千言以究其理且移書廟堂陳救災弭患之道
仁宗即位召拜翰林侍讀學士時方議行科舉壘曰經

明行修質而少華非惟士有實行國家當得真才以登
治平未幾致仕延祐元年遣使給驛送還闕中十二月
以疾卒年七十八贈陝西行省叅知政事追封東平郡
公諡文穆子三人果果楨皆顯仕孫魯濟寧路總管

譚資榮

譚資榮字茂卿興德懷來人敦厚寡言頗知讀書仕金
為縣令歲己卯河朔歸版圖資榮率衆款附主帥稔聞
其名即日以金符授元帥左都監為縣令如故後從征

以功賜金虎符陞行元帥府事復以其弟資用代克元帥左監軍歲壬辰資榮從攻汴梁有功既而舉資用自代退而耕田讀書以為逸老計時年四十子二人曰澄曰山阜澄好讀書又習國語為監縣多善政世祖在潛邸時澄入見世祖嘉其容止安詳留居藩府稱其官而不名以其弟山阜代為縣遣邇臣出使必以澄偕中統元年制書褒美以為懷孟路總管明年入覲賜金符四年易虎符居官時訟至立決教民力田務本歷彰德同

知遷河南路總管兼府尹明年奔父喪中書不聽其終制奏起復莅職後歷司農少卿遷陝西四川提刑按察使踰年西南夷羅羅斯內附帝以澄文武兼資可使鎮撫新國以為副都元帥同知宣慰使司事至其境諭之曰皇元一視同仁不間遠近特置大帥安集招懷以捍外侮非利徵求於汝也夷人大悅尋以疾卒子克修事裕宗於東宮出為江南湖北河北河南陝西漢中三道提刑按察使孫男三人曰忠曰質曰文

王惲

王惲字仲謀衛州汲縣人曾祖經祖字仕金官敦武校尉父天鐸金正大初以律學中首選仕至戶部主事惲有材幹操履端方好學善屬文與東魯王博文渤海王旭齊名史天澤將兵攻宋過衛一見接以賓禮中統元年左丞姚樞宣撫東平辟為詳議官時省部初建今諸路各上儒吏之能理財者一人惲以選至京師上書論時政與渤海周正並擢為中書省詳定官二年春轉翰林

林修撰同知制誥兼國史院編修官尋兼中書省左右
司都事治錢穀擢材能議典禮考制度咸究所長同僚
服之至元五年建御史臺首拜監察御史知無不言論
列凡百五十餘章時都水劉晟交結權勢任用頗專陷
沒官糧四十餘萬石惲劾之暴其姦利權貴側目又言
晟監修太廟畢功特轉官錫賞今纔數年梁柱摧朽事
涉不敬宜論如法晟竟以憂卒秩滿陳天祐雷膺交薦
於朝九年授承直郎平陽路總管府判官初絳之太平

縣民有陳氏者殺其兄行賂緩獄蔓引逮繫者三百餘人至五年不決朝廷委惲鞠之一訊即得其實乃盡出所逮繫者時絳久旱一夕大雨十三年奉命試儒人於河南十四年除翰林待制拜朝列大夫河南北道提刑按察副使尋改置諸道制下遷燕南河北道按部諸郡賊吏多所罷黜十八年拜中議大夫行御史臺治書侍御史不赴裕宗在東宮惲進承華事畧其目曰廣孝立愛端本進學擇術謹習聽政達聰撫軍崇儒親賢去邪

納誨幾諫從諫推恩尚儉戒逸知賢審官凡二十篇裕宗覽之至漢成帝不絕馳道唐肅宗改服絳紗為朱明服心甚喜曰我若遇是禮亦當如是又至邢峙止齊太子食邪蒿顧侍臣曰一菜之名遽能邪人耶詹事丞孔九思從旁對曰正臣防微理固當然太子善其說賜酒慰喻之令諸皇孫傳觀稱其書弘益居多十九年春改山東東西道提刑按察副使在官一年以疾還衛二十二年春以左司郎中召時右丞盧世榮以聚斂進用屢

趣之不赴或問其故惲曰力小任大剝衆利已未聞能
全者遠之尚恐見浼況可近乎既而果敗衆服其識二
十六年授少中大夫福建閩海道提刑按察使黜官吏
貪汙不法者凡數十人察繫囚之寃滯者決而遣之戒
戍兵無得寓民家而創營屋以居之每謂為治之本在
於得人乃進言於朝曰福建所轄郡縣五十餘連山距
海實為邊徼重地而民情輕詭由平定以來官吏貪殘
故山寇往往嘯聚愚民因而蟻附剽掠村落官兵致討

復蹂踐之甚非朝廷一視同仁之意也今雖不能一一擇任守令而行省官僚如平章左丞尚缺宜特選清望素著簡在帝心文足以撫綏黎庶武足以折衝外侮者使鎮靜之庶幾治安可期矣時行省討劇賊鍾明亮無功憚復條陳利害曰福建歸附之民戶幾百萬黃華一變十去四五今劇賊猖獗又酷於華豈可以尋常草竊視之況其地有溪山之險東擊西走出沒難測招之不降攻之不克宜選精兵申明號令專命重臣節制以計

討之使彼勢窮力竭庶可取也二十八年召至京師二十九年春見帝於柳林行宮遂上萬言書極陳時政授翰林學士嘉議大夫成宗即位獻守成事鑑一十五篇所論悉本諸經旨元貞元年加通議大夫知制誥同修國史奉旨纂修世祖寶錄因集聖訓六卷上大德元年進中奉大夫二年賜鈔萬貫乞致事不許五年再上章求退遂授其子公孺為衛州推官以便養仍官其孫倚秘書郎大德八年六月卒贈翰林學士承旨資善大

夫追封太原郡公諡文定其著述有相鑑五十卷汲郡志十五卷承華事畧中堂事記烏臺筆補玉堂嘉話并雜著詩文合為一百卷

元史卷一百六十七

元史卷一百六十七考證

張立道傳十五年除中慶路總管佩虎符 按原刻中

訛忠考地理志中慶路隸雲南行省今據改

張度珍傳丞相巴延嘗語人曰諸將渡江無不荒貪唯

我與國寶始終自守 按語人二字原刻倒置今改

張惠傳其先徙居清河 按原刻作青河今據地理志

改

姜或傳民遮道請留 按原刻脫道字今增

張礎傳授賓州路總管

按原刻作濱州考地理志賓

州隸湖廣行省至元十六年改下路總管府與嶺

北湖南道合若濱州則隸濟南路遠不相涉今據改

欽定四庫全書

元史卷一百六十八

明翰林學士亞中大夫知制誥兼修國史宋濂等修

列傳第五十五

陳祐

天祥

陳祐一名天祐字慶甫趙州寧晉人世業農祖忠博究經史鄉黨皆尊而師之既沒門人謚曰茂行先生祐少好學家貧母張氏嘗剪髮易書使讀之長遂博通經史

時諸王得自辟官屬歲癸丑穆王府署祐為其府尚書
賜其父母銀十錠錦衣一襲王既分土于陝洛表祐為
河南府總管下車之日首禮金季名士李國維楊杲李
微薛元咨訪治道商議古今奏免征西軍數百家及椒
竹諸稅糧料等錢又上便民二十餘事朝廷皆從之世
祖即位分陝洛為河南西路中統元年真除祐為總管
時州縣官以未給俸多貪暴祐獨以清慎見稱在官八
年如始至之日至元二年調官法行改南京路治中適

東方大蝗徐邳尤甚責捕至急祐部民丁數萬人至其地謂左右曰捕蝗慮其傷稼也今蝗雖盛而穀已熟不如令早刈之庶力省而有得或以事涉專擅不可祐曰救民獲罪亦所甘心即諭之使散去兩州之民皆賴焉三年朝廷以祐降官無名乃賜虎符授嘉議大夫衛輝路總管衛當四方之衝號為難治祐申明法令創立孔子廟修比干墓且請于朝著于祀典及去官民為立碑頌德嘗上書世祖言樹太平之本有三一曰太子國本

建立宜早二曰中書政本責成宜專三曰人材治本選
舉宜審事雖未能盡行時論稱之六年置提刑按察司
首以祐為山東東西道提刑按察使時中書尚書二省
並立世祖厭其煩欲合為一集大臣雜議之祐還朝命
預其議阿哈瑪特為尚書平章政事欲奏陞中書右丞
相安圖為太師因罷中書省懼祐有異議許進祐為尚
書叅知政事以啗之及入議祐極言中書政本祖宗所
立不可罷三公古官今存其虛位未須設事遂罷阿哈

瑪特怒其忤已除祐僉中興等路行尚書省事西涼隸永昌王府其達嚕噶齊及總管為人誣搆家各百餘口王欲悉致之法祐力辨其寃王怒甚祐執議彌固王亦尋悟二人皆獲免持祐泣曰公再生父母也朝廷大舉伐宋遣祐僉軍山東民多逃匿聞祐來皆曰陳按察來必無私遂皆出應期而辦十三年授南京總管兼開封府尹吏多震懾失措祐因謂曰何必若是前為盜跖今為顏子吾以顏子待之前為顏子今為盜跖吾以盜跖

待之由是吏知修飭不敢弄法許蔡間有巨盜聚衆劫掠拏捕之急逃入宋境宋亡隨制置夏貴過汴拏斥下馬撾殺之于市民間帖然十四年遷浙東道宣慰使時江南初附軍士俘虜溫台民男女數千口拏悉奪還之未幾行省權民商酒稅拏請曰兵火之餘傷殘之民宜從寬恤不報遣拏檢覆慶元台州民田及還至新昌值玉山鄉盜倉猝不及為備遂遇害年五十六詔贈推忠秉義全節功臣江浙等處行中書省左丞追封河南郡

公謚忠定父老請留葬會稽不得乃立祠祀之祐能詩
文有節齋集子夔芍陂屯田萬戶初在揚州聞祐遇盜
死泣請于行省願復父讐擒其賊魁戮于紹興市臯昌
國州知州真侍儀司通事舍人孫思魯襲芍陂屯田萬
戶思謙湖廣行省叅知政事弟天祥

天祥字吉甫因兄祐仕河南自寧晉徙家洛陽天祥少
隸軍籍善騎射中統三年李璫叛據濟南結宋為外援
河北河南宣慰司承制以天祥為千戶屯三汊口防遏

宋兵事平罷歸居偃師南山有田百餘畝躬耕讀書從之遊者甚衆其居近緱氏山因號曰緱山先生初天祥未之學祐未之奇也別去數歲獻所為詩于祐祐疑假手它人及與語出入經史談辨該博乃大稱異至元十一年起家從仕郎郢復州等處招討司經歷從國兵渡江因論軍中事深為行省叅知賈居貞所器重十三年興國軍以籍兵器致亂行省命天祥權知本軍事天祥領軍士纔十人入其境去城近百里止二日乃至城中

父老來謁天祥諭之曰捍衛鄉井誠不可無兵任事者
籍之過當故致亂爾今令汝輩權置兵仗以自衛何如
民皆稱便乃條陳其事于行省曰鎮遏奸邪當實根本
若內無脩禦之資則外生窺覷之釁此理勢必然者也
推此軍變亂之故正由當時處置失宜疎于外而急于
內凡在軍中者寸鐵尺杖不得在手遂使奸人得以竊
發公私同被其害今軍中再經殘破單弱至此若猶相
防而不相保信豈惟外寇可憂第恐舟中之人皆敵國

矣莫若布推赤心于人使戮力同心與均禍福人則我
之人兵則我之兵靖亂止奸無施不可惟冀少加優容
然後責其必成之效行省許以從便處置天祥凡所設
施皆合衆望由是流移復業以至隣郡之民來歸者相
繼伐茅斬木結屋以居天祥命以十家為甲十甲有長
弛兵禁以從民便人心既安軍勢稍振用土兵收李必
聰山寨不戮一人他寨聞之各自散去境內悉平時州
縣官吏未有俸祿天祥從便規措而月給之以止其貪

民用弗擾鄰邑分寧為變謀者時至吏請捕之天祥曰
彼以官吏貪暴故叛今我一軍三縣官無侵漁民樂其
業使之歸告其黨則謀者反為我用矣遂一無所問及
敗逃入興國境者數千人天祥命驗口給糧仍戒土人
勿侵陵事定皆得保全而歸莫不服其威信居歲餘詔
改本軍為路有代天祥為總管者務變更舊政治隱匿
兵者甚急天祥去未久而興國復變鄰郡壽昌府及大
江南北諸城邑多乘勢殺守將以應之時方改行省為

宣慰司叅政呼圖克特穆爾賈居貞萬戶鄭鼎臣為宣慰使鼎臣率兵討之至樊口兵敗死黃州遂聲言攻陽羅堡鄂州大震時呼圖克特穆爾恇怯不敢出兵天祥言于居貞曰陽羅堡依山為纍素有嚴備彼若來攻我之利也且南人浮躁輕進易退官軍憑高據險區區烏合之衆與之相敵不二三日死傷必多遁逃者十八九我出精兵以擊之惟疾走者乃得脫乘此一勝大勢已定然後取黃州壽昌如摧枯拉朽耳居貞然之而呼圖

克特穆爾意猶未決聞至陽羅堡居貞力趣之乃引兵
宿于青山明日大敗其衆皆如天祥所料初行省聞變
盡執鄂州城中南人將殺之以防內應居貞救之不能
得天祥曰是州之人與彼勢本不相接欲殺之者利其
財耳力止之至是被執者皆縱去復遣天祥權知壽昌
府事授兵二百餘人為亂者聞官軍至皆棄城依險而
自保天祥以衆寡不敵非可以力服乃遣諭其徒使各
歸田里惟生擒其長毛過順周監斬于鄂州市得金二

百兩詢知為鄂州賈人之物召而還之其黨王宗一等十三人繼亦就擒以冬至日放令還家約三日來歸獄皆如期而至白宣慰司盡縱之由是無復叛者百姓為立生祠二十一年三月拜監察御史會右丞盧世榮以掎克聚斂驟陞執政權傾一時御史中丞崔或言之帝怒欲致之法世榮勢熾益張左司郎中周戴因議事微有可否世榮誣以沮法奏令杖一百然後斬之于是臣僚震懾無敢言者二十二年四月天祥上疏極言世榮

奸惡其畧曰盧世榮素無文藝亦無武功惟以商販所
獲之貲趨附權臣營求入仕輿贓輦賄輸送權門所獻
不充又別立欠少文券銀一千錠由白身擢江西權茶
轉運使于其任專務貪饕所犯贓私動以萬計其隱秘
者固難悉舉惟發露者乃可明言凡其掊取于人及所
盜官物畧計鈔以錠計者二萬五千一百一十九金以
錠計者二十五銀以錠計者一百六十八茶以引計者
一萬二千四百五十有八馬以匹計者十五玉器七事

其餘繁雜物件稱是已經追納及未納見追者人所共知今竟不悔前非狂悖愈甚以苛刻為自安之策以誅求為干進之門既懷無饜之心廣蓄攘掇之計而又身當要路手握重權雖位在丞相之下朝省大政實得專之是猶以盜跖而掌阿衡之任不止流殃于當代亦恐取笑于將來朝廷信其虛誑之說俾居相位名為試驗實授正權校其所能敗闕如此考其所行毫髮無稱此皆既往之真跡可謂已試之明驗若謂必須再試止可

叙以他官宰相之權豈宜輕授夫宰天下譬猶製錦初
欲驗其能否先當試以布帛如無能效所損或輕今捐
相位以試驗賢愚猶試美錦以校量工拙脫致隳壞悔
將何追國家之與百姓上下如同一身民乃國之血氣
國乃民之膚體血氣充實則膚體康彊血氣損傷則膚
體羸病未有耗其血氣能使膚體豐榮者是故民富則
國富民貧則國貧民安則國安民困則國困其理然也
昔魯哀公欲重斂于民問于有若對曰百姓足君孰與

不足百姓不足君孰與足以此推之民必須賦輕而後足國必待民足而後豐書曰民惟邦本本固邦寧歷考前代因百姓富安以致亂百姓困窮以致治自有天地以來未之聞也夫財者土地所生民力所集天地之間歲有常數惟其取之有節故其用之不乏今世榮欲以一歲之期將致十年之積危萬民之命易一已之榮廣邀增羨之功不恤顛連之患期鎔銖之誅取誘上下以交征視民如讐為國斂怨果欲不為國家之遠慮惟取

速效於目前肆意誅求何所不得然其生財之本既已
不存斂財之方復何所賴將見民間由此凋耗天下由
此空虛安危利害之機殆有不可勝言者計其任事以
來百有餘日驗其事跡脩有顯明今取其所行與所言
而已不相副者畧舉數端始言能令鈔法如舊鈔今已
虛始言能令百物自賤物今愈貴始言課程增添三百
萬錠不取于民而辦今却迫脅諸路官司增數包認始
言能令民快樂凡今所為無非敗法擾民者若不早有

更張須其自敗正猶蠹雖除去木病亦深始嫌曲突徙薪終見焦頭爛額事至於此救將何及臣亦知阿附權要則榮寵可期違忤重臣則禍患難測緘默自固亦豈不能正以事在國家關係不淺憂深慮切不得無言世祖聞其語遣使召天祥與世榮俱至上都面質之既至即日有內官傳旨縛世榮俱至上都明日入對天祥于帝前再舉其所言與未及盡言者帝皆稱善世榮遂伏誅五月朝廷錄天祥從軍渡江及平興國壽昌之功進

秩五品擢吏部郎中二十三年四月除治書侍御史六月命理算湖北湖南行省錢糧天祥至鄂州即劾平章約蘇穆爾凶暴不法時僧格竊國柄與約蘇穆爾姻黨為其爪牙羽翼誣天祥以罪欲致之死繫獄幾四百日二十五年春正月遇赦得釋二十八年擢行臺侍御史未幾以疾辭歸三十年授燕南河北道廉訪使元貞元年改山東東西道廉訪使時盜賊羣起山東居多詔求彌盜方畧天祥奏曰古者盜賊之起各有所因除歲凶

饑饉諉之天時宜且勿論他如軍旅不息工役薦興聚斂無厭刑法紊亂之類此皆羣盜所起之因中間保護存養之者赦令是也赦者小人之幸君子之不幸一歲再赦善人喑啞前人言之脩矣彼彊梁之徒各執兵仗殺人取貨不顧其生有司盡力以擒之朝廷加恩以釋之旦脫縲囚暮即行劫又復督勒有司給限追捕賊皆經慣習以為常既不感恩又不畏法兇殘悖逆性已頑定誠非善化能移惟以嚴刑可制所擬事條皆切于時

用于是嚴督有司捕得盜賊甚衆皆杖殺之其亡入他境者揣知所向選捕盜官及弓兵密授方畧示以賞罰使追捕之南至漢江二千餘里悉皆就擒無得免者由是東方羣盜屏息平陰縣女子劉金蓮假妖術以惑衆所至官為建立神堂愚民皆奔走奉事之天祥謂同僚曰此婦以神怪惑衆聲勢如此若復有狡獪之人輔翼之倣漢張角晉孫恩之為必成大害遂命捕繫而杖于市自此神怪屏息天祥言山東宣慰司官冗宜罷因劾

奏其使貪暴不法事格不行遂以任滿辭去大德三年
六月遷河北河南廉訪使以疾不起人有冤抑往往就
天祥家求直天祥以不在其位却去之六年陞河南行
臺御史中丞上章論征西南夷事曰兵有不得已而不
已者亦有得已而不得已者惟能得已則已可使兵力永
彊以脩不得已而不得已之用是之謂善用兵者也去歲
行省右丞劉深遠征八百媳婦國此乃得已而不得已之
兵也彼荒裔小邦遠在雲南之西南又數千里其地為

僻陋無用之地人皆頑愚無知取之不足以為利不取
不足以為害深欺上罔下帥兵伐之經過八番縱橫自
恣恃其威力虐害居民中途變生所在皆叛深既不能
制亂反為亂衆所制軍中乏糧人自相食計窮勢蹙倉
皇退走土兵隨擊以致大敗深棄衆奔逃僅以身免喪
兵十八九棄地千餘里朝廷再發陝西河南江西湖廣
四省諸軍使劉二巴圖總管以圖收復叛地湖北湖南
大起丁夫運送軍糧至播州交納其正夫與擔負自己

糧食者通計二十餘萬正當農時興此大役驅愁苦之人往迴數千里中何事不有或所負之米盡到固為幸矣然數萬之軍止仰今次一運之米自此以後又當如何比問西征敗卒及其將校頗知西南遠夷之地重山複嶺陡澗深林竹木叢茂皆有長刺軍行徑路在于其間窄處僅容一人一騎上如登天下如入井賊若乘險邀擊我軍雖衆亦難施為也又其毒霧烟瘴之氣皆能傷人羣蠻既知大軍將至若皆清野遠遁阻其要害以

老我師或進不得前旁無所掠士卒饑餒疫病死亡將
有不戰自困之勢不可不為深慮也且自征伐倭國占
城交趾爪哇緬國以來近三十年未嘗見有尺土一民
內屬之益計其所費錢財所損軍數可勝言哉去歲西
征及今此舉亦復何異前鑑不遠非難見也軍勞民擾
未見休期只深一人是其禍本又聞八番羅國之人向
為征西之軍擾害捐棄生業相繼逃叛怨深入于骨髓
皆欲得其肉而分食之人心皆惡天意亦憎惟須上承

天意下順人心早正深之罪續下明詔示彼一方以聖
朝數十年撫養之恩仍諭自今再無遠征之役以此招
之自有相續歸順之日使其官民上下皆知未須遠勞
王師與區區小醜爭一旦之勝負也昔大舜退師而苗
民格充國緩戰而羗衆安事載經傳為萬世法為今之
計宜且駐兵近境使其水路遠近得通或用鹽引茶引
或用寶鈔多增米價和市軍糧但法令嚴明官不失信
可使米船蔽江而上軍自足食民亦不擾內安根本外

固邊陲以我之鎮靜御彼之猖狂布恩以柔其心畜威以制其力期之以久漸次服之此王者之師萬全之利也若謂業已如此欲罷不能亦當慮其關繫之大審詳成敗算定而行彼溪洞諸蠻各有種類今之相聚者皆烏合之徒必無久能同心敵我之理但急之則相救援之則相疑以計使之互相讐怨待彼有可乘之隙我有可動之時徐命諸軍數道俱進服從者恩之以仁拒敵者威之以武恩威相濟功乃易成若舍恩任威以蹈深

之覆轍恐他日之患有甚于今日也不報遂謝病去七年召拜集賢大學士商議中書省事八月地震河東尤甚詔問弭災之道天祥上章極言陰陽不和天地不位皆人事失宜所致執政者以其言切直抑不以聞天祥自被召還京至是且一歲未嘗得見帝言事輸忠無地常鬱鬱不自釋又不欲苟廩廩祿八年正月移疾謝去至通州中書遣使追留不還帝聞之賜鈔五十貫仍命給傳專官護送至其家天祥望闕拜謝辭所賜鈔而行

九年五月拜中書右丞議樞密院事提調諸衛屯田使者五致詔以年老不能辭十一年仁宗在懷州遣使賜幣帛上尊酒至大四年仁宗即位復遣使召之辭以老疾不起延祐三年四月卒年八十有七累贈推忠正義全德佐理功臣河南江北等處行中書省平章政事追封趙國公諡文忠

劉宣

劉宣字伯宣其先潞人也因出戍留居忻金末避地于

陝後徙太原宣沉毅清介居家孝友自幼喜讀書有經世之志宣撫張德輝至河東見而器重之還朝薦為中書省掾宣暇則往從國子祭酒許衡講明理學初命為河北河南道巡行勸農副使至元十二年入為中書戶部郎中改行省郎中從丞相巴延平章拜珠統軍平江南贊畫居多巴延嘗命宣詣闕上捷書世祖召見親問以南征事應對稱旨賜器服寵嘉之江南平命宣沙汰江淮冗官其所存革悉合公論除知松江府未幾同知

浙西宣慰司事在官五年威惠並著陞江淮行省叅議
擢江西湖東道提刑按察使二十二年入為禮部尚書
遂遷吏部時將伐交趾宣上言曰連年日本之役百姓
愁戚官府擾攘今春停罷江浙軍民歡聲如雷安南小
邦臣事有年歲貢未嘗愆期邊帥生事興兵彼因避竄
海島使大舉無功將士傷殘今又下令再征聞者莫不
恐懼自古興兵必須天時中原平土猶避盛夏交廣炎
瘴之地毒氣害人甚于兵刃今以七月會諸道兵于靜

江北至安南病死必衆緩急遇敵何以應之又交趾無糧水路難通無車馬牛畜馱載不免陸運一夫擔米五斗往還自食外官得其半若十萬石用四十萬人止可供一二月軍糧搬載船料軍須通用五六十萬衆廣西湖南調度頻數民多離散戶令供役亦不能辦况湖廣密邇溪洞寇盜常多萬一奸人伺隙大兵一出乘虛生變雖有留後人馬疲弱衰老卒難應變何不與彼中軍官深知事體者論量萬全方畧不然將復蹈前轍矣及

再征日本宣又上言其畧曰近議復置征東行省再興
日本之師此役不息安危繫焉索多建伐占城哈雅言
平交趾三數言間湖廣江西供給船隻軍須糧運官民
大擾廣東羣盜並起軍兵遠涉江海瘴毒之地死傷過
半即日連兵未解且交趾與我接境叢爾小邦遣親王
提兵深入未見報功索多為賊所殺自遺羞辱況日本
海洋萬里疆土濶遠非二國可比今次出師動衆履險
縱不遇風可致彼岸倭國地廣徒衆猥多彼兵四集我

師無援萬一不利欲發救兵其能飛渡耶隋伐高麗三
次大舉數見敗北喪師百萬唐太宗以英武自負親征
高麗雖取數城而還徒增追悔且高麗平壤諸城皆居
陸地去中原不遠以二國之衆加之尚不能克況日本
僻在海隅與中國相懸萬里哉帝嘉納其言二十三年
十二月中書傳旨議更鈔用錢宣獻議曰原交鈔所起
漢唐以來皆未嘗有宋紹興初軍餉不繼造此以誘商
旅為公邊買賣之計比銅錢易于費孽民甚便之稍有

滯礙即用見錢尚存古人子母相權之意日增月益其
法寔弊欲求目前速效未見良策新鈔必欲創造用權
舊鈔只是改換名目無金銀作本稱提軍國支用不復
抑損三數年後亦如元寶矣宋金之弊足為殷鑒鑄造
銅錢又當詳究秦漢隋唐金宋利病著在史策不待縷
陳國朝廢錢已久一旦行之功費不貲非為遠計大抵
利民權物其要自不妄用始若欲濟丘壑之用非惟鑄
造不敷抑亦不久自弊矣屬僧格謀立尚書省以專國

柄錢議遂罷二十五年由集賢學士除行臺御史中丞
時江浙行省丞相孟古岱悍戾縱肆常慮臺臣糾言其
罪而尤忌宣一日御史大夫與中丞出建康城點視軍
船羣御史從有以軍船載葦者御史張諒詰之知為行
省官所使詣揚州覆實孟古岱盛怒即圖報復時大夫
之父官于屬郡隨被按劾遣其黨造建康伺臺中違失
臺官皆竦懼陰往懇求自解惟宣屹然不動孟古岱怨
宣愈甚羅織宣之子繫揚州獄又令建康酒務淘金等

官及錄事司官以罪免者誣告行臺沮壞錢糧以聞于
朝必欲重寘死地朝廷為遣官二員置獄于行省鞫問
其事宣及御史六人俱就逮既登舟行省以軍船列兵
衛驅迫之至則分異各處不使往來九月朔宣自剄于
舟中始宣將行時書後事緘付從子自誠令勿啟視宣
死視其書辭云觸怒大臣誣搆成罪豈能與經斷小人
交口辨訟屈膝為容于怨家之前身為臺臣義不受辱
當自引決但不獲以負殉國為恨耳嗚呼天乎實鑒此

心且別有公文言孟古岱罪狀後得其藁塗注勾抹辭
句難辨前治書侍御史霍蕭為叙次其文讀者悲憤宣
既引決行省白于朝以為宣知罪重自殺前後構成其
事者郎中張斯立也然宣忠義節操為世所重聞者莫
不嗟悼延祐四年從子自持上宣行實御史臺以聞制
贈資善大夫御史中丞上護軍追封彭城郡公謚忠憲

何榮祖

何榮祖字繼先其先太原人父瑛金貞祐間試文法入

優等補吏後授明威將軍守鉅鹿尹權軍器監主簿金
亡徙家廣平榮祖狀貌魁偉額有赤文如雙樹背負隆
起有相者謂曰子位極人臣且壽相也何氏世業吏榮
祖尤所通習遂以吏累遷中書省掾擢御史臺都事始
折節讀書阿哈瑪特方用事置總管于其家以收四方
之利號曰和市監察御史范方等斥其非論甚力阿哈
瑪特知榮祖主其謀奏為左右司都事以隸已未幾御
史臺除治書侍御史升侍御史出為山東按察使而阿

哈瑪特莫逞其志矣有特穆爾喇實者以貪墨為僉事
李唐卿所劾特穆爾喇實計無所出適濟南有上變告
者唐卿察其妄取訟牒焚之特穆爾喇實乃撫取為辭
告唐卿縱反者逮繫數十人獄久不決詔榮祖與左丞
郝禎叅政耿仁傑鞠之榮祖得其情欲抵告者罪禎仁
傑議以失口亂言之罪坐之榮祖不可俄遷河南按察
使二執政竟以失口亂言杖其人而株連者俱得釋唐
卿之誣遂白平涼府言有南人二十餘輩叛歸江南安

西行省欲上聞會榮祖來為叅政止之曰何必上聞朝廷此輩去者皆人奴耳今聞江南平遁往求其家移文召捕之可也已而逃者俱獲果人奴也治以本罪而付其主其于事明決多類此除雲南行省叅知政事以母老辭又拜御史中丞復出為山東東西道按察使時宣慰使樂實姚演聞膠州海道有制禁戢諸人沮撓糧舶遇暴風多漂覆樂實弗信督諸漕卒償之撈掠慘毒自殺者相繼按察官懼違制莫敢言榮祖曰第言之若朝

廷見譴吾自當之即草辭以奏詔免其徵召入為尚書
叅知政事時僧格專政亟于理算錢穀人受其害榮祖
數請罷之帝不從屢懇請不已乃稍緩之而畿內民苦
尤甚榮祖每以為辭同僚曰上既為免諸路惟未及在
京可少止勿言也榮祖執愈堅至于忤旨不少屈竟不
署其牘未踰月而害民之弊皆聞帝乃思榮祖言召問
所宜榮祖請于歲終立局考校人以為便立為常式詔
賜以鈔萬一千貫榮祖條中外百官規程欲矯時弊僧

格抑不為通榮祖既與之異議乃以病告特授集賢大學士未幾起為尚書右丞僧格敗改中書右丞奏行所定至元新格請改提刑按察司為肅政廉訪司而立監治之法又上言國家用度不可不足天下百姓不可不安今理財者弗顧民力之困言治者弗圖國計之大且當用之人恒多而得用之人恒少要之省部實為根本必擇材而用之按察司雖監臨一道其職在于除蠹弊安斯民苟有弗至則臺省又當遣官體察之庶有所益

帝深然之屢以老疾乞解機務詔免署事惟預議中書而食其祿尋拜昭文館大學士預中書省事又加平章政事以水旱請罷不允先是榮祖奉旨定大德律令書成已久至是乃得請于上詔元老大臣聚聽之未及頒行適子秘書少監惠沒遂歸廣平卒年七十九贈光祿大夫大司徒柱國追封趙國公謚文憲榮祖身至大官而儻第以居飲器用青瓷杯中宮聞之賜以上尊及金五十兩銀五百兩鈔二萬五千貫俾置器買宅以旌其

廉所著書有大畜十集又有學易記載道集觀物外篇
等書

陳思濟

陳思濟字濟民柘城人也幼讀書即曉大義以才器見
稱于時輩間世祖在潛邸聞其名召之以脩顧問既即
位始建省部俾掌敷奏世祖以京兆為國重鎮命廉希
憲等行中書省于陝西思濟實與偕行多所贊畫中統
三年詔誅王文統召廉希憲入中書思濟還仍掌敷奏

事無巨細悉就準繩姚樞許衡皆器重之會阿哈瑪特
入省恥其位在希憲左每欲肆意而行希憲守正不從
及希憲去位省臣晨集掾屬皆憚阿哈瑪特不敢前思
濟獨先以文牘進阿哈瑪特輒于希憲位署押思濟遽
掩以手曰此非君相署位也阿哈瑪特怒目視之思濟
神色自若除右司都事從希憲行省山東未幾召還至
元五年分命中書省總百揆御史臺正百官一時黜陟登
庸憲章程式多出其手遷承務郎同知高唐州事以績

最聞拜監察御史時阿哈瑪特立尚書省權在中書右
思濟與魏初等劾其不法帝命近臣正之御史各以次
對思濟獨厲聲曰御史言官也非為辨訟設拂袖而出
授奉訓大夫知沁州為政簡要不務苛察遷中順大夫
同知紹興路總管府事承檄讞訟桐廬有囚羸瘠將死
縱遣還家候期來決囚拜請曰聞公名久矣若不早決
恐終不可保為閱其案釋之轉同知兩浙都轉運司事
胥吏侵漁民困于賦役悉蠲除之調陝西漢中道提刑

按察副使丁母憂去官二十三年加少中大夫同知浙東道宣慰司事時浙西大水民饑浙東倉廩殷實即轉輸以賑之全活者衆檄上中書奏允之浙東復旱禱于名山雨大澍民賴以甦兩淮鹽課不敷授嘉議大夫兩淮都轉運使奸弊盡革商賈通行歲課以足擢嶺北湖南道肅政廉訪使改池州路總管江浙行省平章伊蘇岱爾威勢赫然摘淘金戶三千括民間田畝檄下力上章以止之累遷中議大夫僉河南江北等處行中書省

事大德五年冬以疾卒年七十贈正議大夫吏部尚書
上輕車都尉追封潁川郡侯謚文肅子誠襲蔭入官拜
監察御史朝列大夫僉廣西道肅政廉訪司事

秦長卿

秦長卿洛陽人也姿貌魁偉性倏儻有大志世祖在京
兆潛藩已聞其名既即位務收攬時才以布衣徵至京
師長卿尚風節好論事與劉宣同在宿衛以氣岸相高
時尚書省立阿哈瑪特專政長卿上書曰臣愚贛能識

阿哈瑪特其為政擅生殺人人畏之固莫敢言然怨毒亦已甚矣觀其禁絕異議杜塞忠言其情似秦趙高私蓄踰公家貲覬覦非望其事似漢董卓春秋人臣無將請及其未發誅之為便事下中書阿哈瑪特為人便佞善伺人主意又其貲足以動人中貴人力為掄解事遂寢由是大恨長卿除興和宣德同知鐵冶事竟誣以折閱課額數萬緡逮長卿下吏籍其家產償官又使獄吏殺之獄吏濡紙塞其口鼻即死未幾王著聚徒殺阿哈

瑪特帝悟亦追罪之斲棺戮屍并誅其子而長卿冤終
不白長卿從子山甫為建康府判官聞長卿冤狀即日
棄官累薦不起以卒山甫子從龍仕至南臺治書侍御
史從德江浙行省叅知政事

趙與鵬

趙與鵬字晦叔宋宗室子嘗登進士第為鄂州教授至
元十一年丞相巴延既渡江與鵬率其宗人之在鄂州
者詣軍門上書力陳不嗜殺人可以一天下且乞全其

宗黨後已延朝京師世祖問宋宗室之賢者已延首以與票對十三年秋九月遣使召至上京幅巾深衣以見言宋敗亡之故悉由誤用權奸詞旨激切令人感動世祖念之即授翰林待制朝廷立法多所咨訪與票忠言讜論無所顧惜進直學士轉侍講疏陳江南科斂急督移括大姓宋世邱壘暴露皆大臣擅易明詔所為二十七年京師霧四塞明年正月甲寅虎入南城與票又疏言權臣專政之咎退而家居待罪未幾僧格敗平章博

果密奏與票貧窶有守有抱負世祖曰得非指權臣為
虎者耶賜鈔萬三千貫歲給其妻子衣糧後累遷翰林
學士其伯祖師淵嘗從朱熹學家庭授受具有端緒于
是與許衡論伊洛間與衡雅敬之與票既老成宗命特
官其子孟寶以終養大德七年以疾卒家貧無以為葬
成宗命有司賻鈔五千貫給舟車還葬台州之黃岩贈
通議大夫禮部尚書上輕車都尉天水郡侯謚文簡

姚天福

姚天福字君祥絳州人父居實避兵徙雁門天福幼讀春秋通大義及長以材辟懷仁丞至元五年詔立御史臺以天福為架閣管勾尋拜監察御史每廷折權臣帝嘉其直錫名巴爾斯謂其不畏彊悍猶虎也仍厚賜以旌其忠天福曰臣職居糾彈惟負爵祿是懼敢貪厚賞以重臣罪時御史臺置二大夫綱紀無統天福言于世祖曰古稱一蛇九尾首動尾隨一蛇二首不能寸進今臺綱不張有一蛇二首之患陛下不急拯之久則紊不

可理帝詔伊蘇特穆爾及博囉諭之博囉以年幼自劾
天福時按行畿內有出使者凌民取賄天福乃易服間
行得其狀奏戮之以徇豪右帽服十二年詔罷各道按
察司天福白大夫伊蘇特穆爾曰是司之設所以廣視
聽虞非常慮至深遠不但繩有司而已也大夫駭然曰
微公言幾失之夜入帝臥內奏其言帝大悟詔復立之
權臣不悅左遷天福朝列大夫衡州路同知不就起為
河東道提刑按察副使時北鄙兵興轉輸煩急河東民

苦徭役天福以反側為憂劾執政失計奏罷其役徵拜
中順大夫治書侍御史十六年江南既平授嘉議大夫
淮西道按察使淮甸當兵衝將吏有豪猾為民害者悉
剷除之民大悅轉湖北道按察使發省臣贓事數十以
聞帝以其嘗有勲勞特原之而流其黨與州郡稱治二
十年遷山北道按察使其民鮮知稼穡天福教以樹藝
皆致蕃富民為建祠而刻石以紀之二十二年入為刑
部尚書尋出為揚州路總管二十六年復為淮西按察

使按鉅奸一人沒其家貲政化大行二十八年僧格敗
考訊黨援平陽為多以天福為平陽總管俾窮治其事
俄拜甘肅行省叅知政事以母老辭三十一年授陝西
漢中道肅政廉訪使尋除真定路總管真定驛傳之需
多為民害天福更議措置之方使不擾民憲長爭之省
臣以其事聞詔從之頒其制為天下式大德二年授江
西行省叅政以疾辭四年拜叅知政事大都路總管兼
大興府尹畿甸大治後之尹京者以天福為稱首六年

以疾卒年七十三初天福拜御史時其母戒之曰古稱公爾忘私委質為臣當罄所衷以塞其職勿以未亡人為卹俾吾追蹤陵母死之日猶生之年也天福亦請于憲府曰監察責當言路有犯無隱苟獲譴乞不為親累或以聞帝嘆曰巴爾斯母子雖生今世其義烈之言當于古人中求之子祖舜秘書監著作即侃內藏庫副使

許國禎

許國禎字進之絳州曲沃人也祖濟金絳州節度使父

日嚴榮州節度判官皆業醫國禎博通經史尤精于醫術金亂避地嵩州永寧縣河南平歸寓太原世祖在潛邸國禎以醫徵至瀚海留掌醫藥莊聖太后有疾國禎治之刻期而愈乃張宴賜座太后時年五十三遂以白金錠如年數賜之拜姓王妃病目治者鍼誤損其明世祖怒欲坐以死罪國禎從容諫曰罪固當死然原其情乃恐怖失次所致即誅之後誰敢復進世祖意解且獎之曰國禎之直可作諫官宗王寶保屢請以國禎隸帳

下世祖重違其請將遣之辭曰國禎蒙恩拔擢誓盡心以報不敢易所事乃不果遣世祖過飲馬湏得足疾國禎進藥味苦却不服國禎曰古人有言良藥苦口利于病忠言逆耳利于行已而足疾再作召國禎入視世祖曰不聽汝言果困斯疾對曰良藥苦口既知之矣忠言逆耳願留意焉世祖大悅以七寶馬鞍賜之憲宗三年癸丑從征雲南機密皆得參與朝夕未嘗離左右或在告帝輒為之不悅九年己未世祖帥師圍鄂州獲宋人

數百族諸將欲盡阬之國禎力請止誅其兇暴餘皆獲免及師還招降民數十萬口疲餓顛仆者滿道國禎白發蔡州軍儲糧賑之全活甚衆世祖即位錄前勞授榮祿大夫提點太醫院事賜以符至元三年改授金虎符十二年遷禮部尚書國禎嘗上疏言慎財賦禁服色明法律嚴武備設諫官均衛兵建學校立朝儀事多施行凡所薦引皆知名士士亦歸重之帝與近臣言及勲舊大臣因謂國禎曰朕昔出征同履艱難者惟卿數人在

爾遂拜集賢大學士進階光祿大夫每進見帝呼為許
光祿而不名由是內外諸王大臣皆以許光祿呼之陞
翰林集賢大學士卒年七十六時大臣非有勲德為帝
所知者罕得贈謚特贈國禎金紫光祿大夫謚忠憲人
以為榮後加贈推誠廣德協恭翊亮功臣翰林學士承
旨上柱國追封薊國公初國禎母韓氏亦以能醫侍莊
憲太后又善調和食味稱旨凡四方所獻珍膳旨酒皆
命掌之太后閱其勞賜以真定宅一區歲給衣廩終身


國禎由是家焉子展

展字君黼一名和爾果斯從其父國禎事世祖于潛邸
進退莊重世祖喜之賜令名俾從許衡學入脩宿衛忠
慎小心嘗因事忤旨欲罪之帝悔謂近侍特爾格曰朕
欲罪和爾果斯汝何不言汝二人自今結為兄弟有所
譴責則更相進諫乃置金酒中賜二人飲以為盟時裕
宗居東宮帝又諭和爾果斯曰若太子罪汝將誰諫耶
遂命東宮臣慶善努亦同飲金酒俄除禮部尚書提點

太醫院事賜日月龍鳳文綺衣二襲每外國使至必命與之語辭理明辨莫不傾服改尚醫太監帝嘗命畫工寫其像賜之轉正議大夫仍提點太醫院事有竊大安閣禮神之幣者將誅之羣臣莫敢言和爾果斯獨諫曰敬神善事也因置人于死地臣恐神不享所祭帝即命釋之和爾果斯與丞相安圖善國政多所贊益僧格忌之數譖于上帝不之信僧格敗繫于左腋門帝命和爾果斯往唾其面辭不可帝稱其仁厚賜以白玉帶且諭

之曰以爾明決無瑕有類此玉故以賜爾也成宗即位遷中書右丞行太常卿力辭乃命以中書右丞署太常事俄改陝西行中書省右丞時關中饑議發倉粟賑之同列以未得請于朝不可和爾果斯曰民惟邦本今饑餒如此若俟命下無及矣擅發之罪吾當獨任之不以累公等遂大發粟不數日命亦下明年旱禱于終南山而雨歲以大熟民皆畫像祀之和爾果斯不事生業田宅皆上所賜有足疾不能行仁宗以為先朝老臣特赦

乘小輿入禁中訪以舊事後足益弱不可出每國有大
政詔使近侍即其家問之特授榮祿大夫大司徒食其
祿終身贈推忠守正佐理功臣光祿大夫陝西等處行
中書省平章政事柱國追封趙國公謚僖簡



元史卷一百六十八

元史卷一百六十八考證

陳天祥傳危萬民之命易一已之榮 按一已原刻作

一世今據元文類改

陳天祥傳元貞元年改山東東西道廉訪使 按原刻

脫一東字今據百官志增

陳天祥傳延祐三年四月卒於家年八十有七 按張

養浩所撰神道碑載天祥年八十有七又稱大德九

年為中書右丞時年七十六考之本紀大德九年至

延祐三年相距十二年天祥是時實八十有七歲原刻作年八十今據改

劉宣傳二十二年入為禮部尚書 按原刻作二十三年考下文議鈔法事方繫之二十三年則此處三字乃二字之訛吳激行狀亦同今據改